

POVODOM PROSLAVE 10-GODIŠNJICE GLASNIKA

Na skupštini Saveza geodetskih inženjera i geometara BiH održanoj 15. aprila 1967. godine, rečeno je: "Naš Savez treba da počne sa izdavanjem Glasnika. Neka to bude list koji će s pravom opravdati svoje ime. Njegovo aktivno djelovanje ne bi trebalo da se svede na pasivno registrovanje događaja, već bi trebalo da prati unutrašnje procese u radu društva i da inicira dalji razvoj i djelovanje. Takodje, neka to bude prva stepenica gdje će mladi ljudi, a i izrasli stručnjaci imati mogućnosti da na stranicama Glasnika saopšte svoje preokupacije ili iznesu studiozan rad na polju istraživanja i slično".

Ova poruka izrečena prije deset godina bila je vodilja za sve radnike i saradnike Glasnika. Za ovo vrijeme izašlo je petnaest brojeva, a sa šesnaestim brojem Glasnika označavamo ovaj jubilej.

Možda se moglo uraditi i više. U početku smo tako i zacrtali, ambicije su vile velike, ipak, ima i opravdanja što nije bilo tako.

Činjenica je, da je to prvi list u Bosni i Hercegovini koji je govorio o nama geodetima, o našem radu, željama i njihovim ostvarenjima.

Trebalo je imati iskustva u takvom poslu. Trebalo je za ovih deset godina prenijeti sve informacije, u prvom redu o radu Saveza, zatim o školstvu i školovanju geodetskog kadra, stručne članke, obavijesti i drugo.

Trebalo je imati i materijalna sredstva za ono najnužnije: kucanje, štampanje, poštarinu i slične troškove.

Saradnici i tematika lista

Pokrećući osnivanje glasila Saveza geodetskih inženjera i geometara BiH, želili smo informisati najveći mogući broj geodetskih stručnjaka o svim akcijama koje poduzimamo preko našeg Saveza prvenstveno u SR BiH.

Takvih akcija bilo je dosta.

Pisano je o radu Saveza i Plenumu, o radu Predsjedništva, opširno je pisano o godišnjim skupštinama Saveza i zaključcima donijetim na njima. Izvještavano je o svim stručnim manifestacijama u Jugoslaviji, o akcijama SGIGJ, zatim o radu društava drugih zemalja, o stručnim izložbama, kongresima, savjetovanjima i slično, što je bilo interesantno za naše geodetske stručnjake.

Osim ovakvih prikaza aktivnosti Saveza i informacija o radu na svim poljima geodetske djelatnosti, napisano je dosta članaka naučnog, stručnog i stručno-informativnog karaktera.

Pišući te članke pojavilo se oko dvanaest autora.

To su mahom mladi ambiciozni ljudi, koji žele svoj naučni rad da ogłase i učine dostupnim i drugima.

To i jeste jedan od osnovnih kvaliteta Glasnika, koji treba ustaliti, produbiti i proširiti.

Na 584 stranice, koliko je bilo štampanog teksta u ovih petnaest brojeva, bile su zastupljene i druge rubrike, kao: Nove knjige, Obavijesti, Vijesti iz podružnica, Vijesti iz škola, In memoriam i druge.

Dva broja bila su sa posebnom sadržinom. Jedan je bio sa zbirkom zakona vezanih za geodetsku djelatnost, a jedan je posvećen osnivanju Geodetskog smjera na Gradjevinskom fakultetu u Sarajevu.

Ovakvim sadržajima registrovana su ona osnovna zbivanja u društvenom radu, počeci i želje u naučnom iskazivanju, ali moramo priznati da se moglo i moralo i daleko više.

Još imamo veliki broj društvenih i naučnih radnika u našoj struci, koji bi se morali obavezno pojavljivati sa svojim priložima i radovima na stranicama Glasnika.

Na taj način onaj zahtjev geodetskih stručnjaka postavljen prije deset godina, kakav treba da bude Glasnik, bio bi tek tada potpuno realizovan.

Ovako, predstoji nam jedno obavezno prestrojavanje. O Glasniku treba da se brine više ljudi. Treba stvoriti ili pronaći grupu entuzijasta koji će u daleko masovnijem broju, voditi brigu o obimu i kvalitetu ovog lista.

U Sarajevu je otvoren Geodetski smjer, visokoškolska ustanova koja je okupila veliki broj naučnih radnika koji bi mogli biti nosioci i velika garancija za navedeni kvalitet lista. Tu je i Geodetska uprava, Geodetski zavod, Škola i mnoga preduzeća gdje imamo vrsnih stručnjaka koji su obuhvaćeni i društvenim radom u Savezu i svojim podružnicama, a i na stručnom polju u svojim radnim organizacijama.

Sve nam to govori da bi mogli daleko više učiniti na sadržaju i kvalitetu lista.

Finansiranje lista

Dosadašnje finansiranje lista bilo je garancija da će izlaziti jedan do dva broja godišnje, ali je ujedno bilo i velika kočnica da list bude obimniji, sadržajniji i da godišnje izlazi bar četiri puta, kako je bilo i planirano.

Obavezu finansiranja na sebe je preuzeo Savez GIG-a SR BiH, a u tome povremeno ga je pomagala Republička geodetska uprava i jednom Geodetski zavod iz Sarajeva.

To su bili svi finansijski izvori, pomoću kojih se i nije moglo više postići.

O drugim izvorima finansiranja kojih može biti mnogo više, treba razmišljati paralelno sa podizanjem obima i kvaliteta lista.

Zato, neka proslava 10-godišnjice Glasnika, bude povod za dogovor o novom, sadržajnijem listu, sa većim brojem saradnika i sa sigurnijom i boljom materijalnom podlogom.